

hilgen apostel sunte Mathias unde mynen hilgen hovetheren sunte Steffen, allen goddes hilgen unde in dat gemeyne bet aller saligen cristenmynschen, den lichnam to der erden to bestedigen na mynen dode to sunte Steffen mynen hilgen patronen mit vigilien, selemissen unde commendatiēn, so id dar wontlich is. Des lese ic̄ in warhaftige testamentarien, dede na mynen dode scullen fullenbringen dut myn testament unde mynen lesten willen, de ersamen manne Hinrich Bockman, Hermen Pennigſack, Hans Godeken unde Hans Müller: de sulſten sette ic̄ in de fullenkommen macht unde were mynes testamenteſ na mynen dode, des ic̄ one truwelken wol to love unde ſe meck dar nicht willen inne bedregen. Dusſe veer upgemelten testamentarien ſchullen hebben de fullenkommen macht alle mynes gudes na mynen dode unde ſe ſchullen fortſetzen unde vorforderen mit allem flite mynen lesten willen an¹⁾ oren ſcaden. Weret nu dat eyn van den testamentarien vorstorbe, ſo ſcullen de anderen dree in den veer weken to ſic̄ leſen²⁾ eynen anderen fromen borger de one bequeme unde nutte is, unde ic̄, Mette, nagelaten weddewe Hans Honſteyns ſeliger, hebbe twintich gulden mit Hinrich Bockman,, ſes unde drittich mathiergroschen up den gulden, dar he alle jar gift eynen gulden tinck af; Hermen Pennigſack twintich gulden, ſes unde drittich mathiergroschen up den gulden, darvan gift he alle jar eynen gulden tinck; Hans Ellerdes twintich gulden, ock ſes unde drittich mathiergroschen up den gulden unde ock eynen gulden tinck alle jar; unde an Jorden Lessen huse hebbe ic̄ alle jar twe gulden tinck mit fertich gulden aftolosen. Unde darto hebbe ic̄ noch twey braupannen, de ſchal men ock utbringen up dat alderdinste vor gelt edder tinck. Mit ſodanen upgescreven tincke unde gute ſcullen myne testamentarien mynen lesten willen vortſetten unde fullenbringen.

So is myn leſte wille ſo hyr na volget: myne testamentarien upgemelt na mynen dode, wannen nu jartid is, ſcullen ſe alle jar holden laten eyne memorien in der kerken to sunte Steffen bÿnnen der ſtadt Helmestede mit allen preſteren, mit

¹⁾ an = ohne. — ²⁾ leſen — wählen.